

ISLAMISASI DAN KRISTIANISASI DI KALANGAN ORANG ASLI TEMUAN, BROGA

By:

Mohd Nizam Sahad *
Che Zarrina Sa'ari **

Abstract

This article focuses on the process of islamization and christianization among the Temuan Aborigines of Broga. The Temuan Aborigines in Broga had been chosen as the subject of this article since there is a competition between the Islamic dā'ī and Christian missionary to convert them to either Islam or Christianity. This article also attempts to know the reasons of acceptance and reluctance to embrace these religions among the aborigines.

Pendahuluan

Orang Asli di Semenanjung Tanah Melayu kebanyakannya masih kekal dengan kepercayaan animisme. Namun

* Mohd Nizam Sahad adalah calon Doktor Falsafah di Jabatan Akidah dan Pemikiran Islam, Akademi Pengajian Islam, Universiti Malaya, Kuala Lumpur.

** Profesor Madya Dr. Che Zarrina Sa'ari adalah pensyarah di Jabatan Akidah dan Pemikiran Islam, Akademi Pengajian Islam, Universiti Malaya, Kuala Lumpur. Beliau kini menjawat jawatan Timbalan Pengarah Pembangunan dan Penyelidikan, Akademi Pengajian Islam, Universiti Malaya.

demikian, dengan kemasukan golongan pendakwah ke kawasan petempatan mereka, mereka didedahkan kepada agama-agama dan kepercayaan baru yang menjadi alternatif kepada kepercayaan tradisi yang menjadi pegangan mereka sejak turun-temurun. Proses penerimaan agama-agama baru ini telah mengubah cara berfikir dan tanggapan mereka terhadap konsep-konsep keagamaan sebelumnya.

Latar Belakang Anutan Agama Orang Asli Temuan Broga

Jumlah penduduk perkampungan Orang Asli Broga¹ ini seramai 152 orang dengan 76 orang penduduk lelaki dan 76 orang penduduk perempuan. Jumlah kelamin adalah sebanyak 32 buah keluarga.² Penulis telah memilih ketua keluarga setiap isi rumah sebagai responden kajian.

¹ Perkampungan Orang Asli Broga terletak bersebelahan dengan pekan masyarakat Cina Tarun dan kawasan kaki bukit sempadan Selangor – Negeri Sembilan. Kampung Ringking, di Selangor dan Kampung Lumut, di Negeri Sembilan merupakan perkampungan yang terletak bersebelahan dengan kawasan tersebut. Jarak perjalanan lokasi itu dengan pekan Semenyih kira-kira lapan kilometer dan jaraknya dengan bandaraya Kuala Lumpur sejauh 39 kilometer. Perjalanan penulis ke Broga melalui pekan Hulu Langat dan Empangan Semenyih dari Kuala Lumpur dengan kelajuan purata 80 km/j memakan masa kira-kira 50 minit. Perhubungan jalan raya dari perkampungan Orang Asli Broga ini ke kawasan sekitarnya berturap dengan baik.

Kampung Orang Asli Broga merupakan salah satu perkampungan Orang Asli di Daerah Hulu Langat selain dari Kampung Kuala Pangsun, Kampung Paya Lebar Sungai Lui, Kampung Genting Peras, Kampung Gabai, Kampung Padang Sungai Congkak, Kampung Donglai Baru di Mukim Ulu Langat dan Kampung Sungai Lalang Baru dan Kampung Kachau di Mukim Ulu Semenyih. Kesemuanya terdapat sejumlah sembilan buah perkampungan Orang Asli di daerah Hulu Langat ini.

Kampung ini diketuai oleh seorang Tok Batin atau Penghulu yang bernama Batin Berin bin Uдах. Beliau dibantu oleh pembantu Tok Batin yang dikenali sebagai Tok Jenang iaitu Encik Johos bin Sibas atau Johos Abdullah. Sementara itu, menurut data klasifikasi kampung JHEOA, Kampung Broga dikategorikan sebagai kampung yang maju yang terletak di pinggir bandar dengan bilangan keluarga termiskin seramai 5 keluarga, miskin 24 keluarga dan luar miskin seramai 4 keluarga.

² Sumber diperolehi daripada pejabat JHEOA Daerah Hulu Langat pada 5 Mei 2000.

Ditinjau dari sudut kepercayaan, majoriti masyarakat Orang Asli Temuan di Broga menganuti agama Kristian. Selain itu, ada di kalangan mereka yang beragama Islam dan menganut fahaman animisme. Dari segi bilangan keluarga, terdapat sejumlah 19 buah keluarga yang menganut Kristian, 4 buah keluarga menganut Islam dan selebihnya sebanyak 9 buah keluarga masih mengekalkan kepercayaan animisme.³ Anutan agama Kristian dan Islam di kalangan mereka adalah rentetan daripada usaha misionari Kristian dan dakwah Islamiyah yang dilakukan. Sebelum dari usaha-usaha ini, majoriti mereka menganut sistem kepercayaan animisme. Batin Berin bin Uдах sendiri masih berpegang kepada kepercayaan animisme dan tidak terpengaruh dengan agama samawi Kristian mahupun Islam. Sistem kepercayaan animisme di kalangan mereka ini diwarisi secara turun temurun sejak zaman berzaman.

Jadual 1
Sistem Kepercayaan Orang Asli di Broga

| Agama | Jumlah | Peratus (%) |
|---------------|------------|-------------|
| Animisme | 47 | 31 |
| Islam | 16 | 10.5 |
| Kristian | 89 | 58.5 |
| Jumlah | 152 | 100 |

Sumber: *Kaji Selidik Tahun 2000*

Islamisasi dan Kristianisasi Di Kalangan Orang Asli Temuan Broga

Islamisasi atau pengislaman merupakan usaha menjadikan manusia atau sesuatu sistem sejajar dengan ajaran agama Islam.⁴ Kristianisasi atau pengkristianan pula merupakan

³ *Ibid.*

⁴ Teuku Iskandar *et.al.* (1998), *Kamus Dewan*, Kuala Lumpur: Dewan Bahasa Pustaka, h. 501.

usaha mengkristiankan seseorang.⁵ Islamisasi dan Kristianisasi sememangnya dua perkara yang saling bertentangan. Usaha Islamisasi di Malaysia sememangnya mendapat sokongan padu daripada pihak kerajaan. Hal ini bersesuaian dengan peruntukan dalam Perlembagaan Malaysia yang menyatakan bahawa agama Islam sebagai agama rasmi negara Malaysia. Di dalam perlembagaan. Perkara (3) ceraihan (1) telah menjelaskan;

“Agama Islam ialah agama bagi persekutuan, tetapi agama-agama lain boleh diamalkan dengan aman dan damai di mana-mana bahagian dalam persekutuan.”⁶

Peruntukan perlembagaan ini bukan sahaja sekadar memberi kebebasan beragama kepada penganut agama-agama lain selain Islam, bahkan turut memberi ruang yang lebih kepada agama Islam untuk berkembang. Dalam usaha-usaha para pendakwah Islam mendekati golongan Orang Asli, pihak kerajaan dilihat memberi bantuan secara langsung dan tidak langsung melalui Jabatan Hal Ehwal Orang Asli (JHEOA), Jabatan Kemajuan Islam Malaysia (JAKIM) dan Jabatan Agama Islam Negeri.

Sementara itu, gerakan Kristianisasi di kalangan Orang Asli pula dianggap oleh sesetengah pihak⁷ dilihat bahawa ia mendapat sekatan dan halangan secara tidak langsung. Melalui surat kebenaran kepada penulis dalam menjalankan penyelidikan di kalangan Orang Asli Broga dari JHEOA, Kuala Lumpur disertakan syarat-syarat mengadakan kajian di mana setiap penyelidik dilarang menyebarkan kepercayaan agama kepada masyarakat Orang Asli kecuali kepercayaan agama Islam sebagai agama rasmi negara Malaysia. Namun demikian, walaupun ada halangan dan sekatan tertentu, pihak misionari Kristian telah berjaya juga

⁵ *Ibid.*, h. 713.

⁶ *Perlembagaan Persekutuan* (Hingga 1 Januari 1999), Kuala Lumpur: International Law Book Services, h. 1.

⁷ Sila lihat Ghazali Basri (1994), *Kristianisasi Sebagai Sebuah Gerakan Satu Tinjauan Sosiologi*, Petaling Jaya: Budaya Ilmu Sdn. Bhd., h. 53-60.

mengkristiankan Orang Asli di Malaysia. Hasil usaha berterusan dan pendekatan yang berseesuaian dalam usaha pengkristianan di kalangan Orang Asli menjadi salah satu faktor kejayaan mereka.

Hasil pemerhatian penulis, usaha-usaha Islamisasi dan Kristianisasi di Broga pada masa sekarang ini dilihat berjalan serentak. Namun demikian dinilai dari sudut angka bilangan anutan agama di kalangan mereka, gerakan Kristianisasi di Broga dilihat lebih berjaya menarik minat Orang Asli. Dari hasil soal selidik yang dijalankan, beberapa faktor kejayaan mereka telah dikenal pasti. Antaranya ialah agama Kristian dikatakan lebih bertoleransi dengan adat dan pantang larang masyarakat Orang Asli Temuan terutamanya dalam soal pemakanan. Di samping itu juga, pihak gereja turut memberi perhatian penuh kepada penganut Kristian serta memberi bantuan material kepada mereka yang memerlukan. Selain daripada itu, di musim-musim perayaan agama Kristian, kadang-kadang pihak gereja turut memberi hadiah berbentuk keperluan harian kepada mereka seperti gula dan beras. Penulis sendiri pernah melihat bagaimana Pastor David Lim⁸ menghulurkan wang kertas lima puluh ringgit untuk diserahkan kepada salah seorang penganut Kristian yang uzur dan sakit.

Sejarah kristianisasi di kalangan Orang Asli Broga mula menampakkan kejayaan di sekitar tahun 1987, iaitu selepas peristiwa penyembuhan anak Encik Sharip Bin Tajam. Pihak gereja berjaya menyakinkan sebilangan Orang Asli di Broga bahawa penyembuhan tersebut mempunyai perkaitan dengan kepercayaan terhadap Tuhan Jesus.

Di samping itu juga, penulis memerhatikan bahawa pihak gereja memberi sepenuh perhatian dalam usaha pengkristianan Orang Asli di Broga dengan terus berusaha mengkristiankan Orang Asli yang tidak mempunyai agama.

⁸ Seorang pastor atau paderi aliran Protestan dari Kelawang, Negeri Sembilan yang sering datang ke Broga pada setiap hujung minggu untuk bersama-sama menjalankan upacara sembahyang di gereja Perkampungan Orang Asli Broga.

Pihak gereja di bawah Pastor David Lim datang meninjau dan mengajar firman Tuhan di dalam *al-Kitāb* atau *Bible* dua kali sebulan dan akan bersama-sama penduduk mengerjakan sembahyang di gereja. Pihak gereja juga turut melantik Encik Sharip bin Tajam sebagai pembantu pastor dalam usaha mengkristiankan Orang Asli di Broga.

Ringkasnya, di perkampungan Orang Asli Broga, wujud persaingan yang sihat di antara pendakwah Islam dan mubaligh Kristian untuk mengajak penduduk di sana untuk menganuti agama Islam mahupun agama Kristian. Ibarat satu perlumbaan yang dimulakan terlebih dahulu oleh agama Kristian, maka dipandang dari sudut statistik dan bilangan penganut Kristian yang lebih ramai di Broga bukanlah sesuatu yang menghairankan dan ia agak munasabah. Di samping itu juga, gaya dan corak pemikiran masyarakat Orang Asli di Broga yang telah menerima agama-agama besar dunia seperti Islam dan Kristian dilihat lebih cenderung kepada cara berfikir jiran mereka yang beragama Kristian berbangsa Cina di pekan Broga dan beragama Islam yang berbangsa Melayu di Ulu Beranang yang terletak 5 km daripada Kampung Orang Asli Broga tersebut.

Agama Islam di Kalangan Orang Asli

Sejarah kegiatan dakwah Islamiyah di kalangan Orang Asli Semenanjung Malaysia yang pertama dikatakan berpunca daripada hasil usaha Muhammad Salam bin Ahmad al-Badwi di negeri Perak. Akhbar Saudara bertarikh 6 Mei 1936 mencatatkan:

“Pada hadrat al-Fadzil Tuan Qadi itu telah bersungguh-sungguh mengorbankan dirinya dengan ikhlasnya pada menasihatkan sakai-sakai rimba daerah Gong itu bertarikh 1hb Ogos 1933 hingga pada masa ini masih lagi bersungguh-sungguh tuan itu menjalankan tadbirnya dengan perjalanan nasihat yang lemah lembut serta tahan tuan itu bersusah payah dalam hutan rinba dan beberapa jua

sengsaranya yang telah didapatnya melainkan ia sabar serta tawakkal jua.”⁹

Usaha awal dakwah Islamiyah di kalangan Orang Asli ini mendapat sambutan baik. Pada tahun 1940, seramai 300 Orang Asli telah memeluk agama Islam di negeri Perak.¹⁰

Di kampung Orang Asli Broga pula, berdasarkan banci yang dilakukan oleh JHEOA Daerah Hulu Langat, Selangor, terdapat seramai 16 orang Orang Asli yang menganuti agama Islam. Bilangan ini berjumlah 10.5% daripada keseluruhan penduduk Orang Asli Broga yang berjumlah seramai 152 orang. Berdasarkan jumlah ini, dapatlah disimpulkan bahawa penerimaan terhadap agama Islam di kalangan masyarakat Orang Asli di Broga amat kurang menggalakkan. Hasil kaji selidik dan analisis yang dilakukan, terdapat beberapa faktor penyebab berlakunya keadaan sedemikian.

Sebab-Sebab Penerimaan

Faktor perkahwinan dengan Orang Melayu Islam adalah faktor utama penerimaan sebilangan kecil daripada mereka yang memeluk agama Islam di kalangan Orang Asli di Broga. Daripada empat buah keluarga yang menganuti agama Islam di Kampung Orang Asli Broga, dua buah keluarga daripadanya menerima agama Islam dengan cara perkahwinan. Mereka adalah Puan Sakdiah binti Tambun¹¹ dan Puan Suzi binti Adan atau nama Islamnya Siti Aishah

⁹ Petikan dari akhbar *Saudara* bertarikh 6 Mei 1936 bertajuk ‘Sakai-sakai yang memeluk agama Islam di Gong Teluk Anson.’

¹⁰ Mahani Musa (1996), “Orang Asli di Tanah Melayu: Satu Evolusi Hubungan dengan Pemerintah dan Masyarakat Luar dari Akhir Abad ke-19 hingga 1960-an.” dalam *Jurnal Ilmu Kemanusiaan*, Jil. 3, Pulau Pinang: Pusat Pengajian Ilmu Kemanusiaan, Universiti Sains Malaysia, h. 64.

¹¹ Puan Sakdiah menganut agama Islam pada tahun 1993 bila mendirikan rumahtangga dengan Encik Muhammad Zin bin Jamadin yang berbangsa Melayu. Beliau pada asalnya berkepercayaan animisme.

binti Abdullah.¹² Mereka menganuti agama Islam sebagai menuruti anutan agama suami mereka masing-masing yang berbangsa Melayu.

Sementara itu, usaha dakwah yang dilakukan oleh Penggerak Masyarakat JAKIM di Broga, iaitu Puan Rozita binti Man dan suaminya Encik Hamzah bin Abdullah¹³ juga merupakan salah satu faktor penerimaan mereka terhadap agama Islam. Hasil usaha dakwah secara berterusan dan pergaulan serta sikap ramah mesra dengan masyarakat Orang Asli Broga, beliau berjaya menyakin dan mengislamkan keluarga Rahim bin Jaya,¹⁴ isteri dan anak-anaknya.

Selain daripada itu, faktor penerimaan hidayah Allah S.W.T melalui mimpi juga menjadi penyebab agama Islam diterima sebagai pegangan dan anutan. Johos bin Sibas atau nama Islamnya, Johos bin Abdullah, Tok Jenang Kampung Orang Asli di Broga, menerima alamat mimpi yang menyuruhnya bertaubat dan memeluk agama Islam. Selepas mengalami mimpi tersebut, beliau tidak memakan makanan yang dilarang dalam agama Islam seperti daging khinzir, tupai, monyet dan sebagainya selama sebulan. Seterusnya, beliau menceritakan kepada isteri beliau tentang mimpi tersebut dan menganjurkan kepada isteri dan anak-anaknya untuk memeluk agama Islam bersama-sama beliau. Selepas tiga tahun mempelajari selok belok agama Islam secara

¹² Puan Suzi menganuti agama Islam pada 18 Februari 1999. Beliau pada asalnya menganuti agama Kristian dan mendapat tentangan dari keluarganya dan Orang Asli Kristian di Broga apabila beliau ingin mendirikan rumahtangga dengan suaminya, Encik Haslan bin Abu Bakar dan seterusnya memeluk agama Islam sebagai anutan.

¹³ Encik Hamzah bin Abdullah adalah Penggerak Masyarakat Orang Asli di Kampung Orang Asli Pangsun, Hulu Langat, Selangor Darul Ehsan.

¹⁴ Encik Rahim bin Jaya berasal dari Perak dan dari suku bangsa Jakun. Beliau berkahwin dengan Syila binti Johos, anak Tok Jenang. Mereka diislamkan pada 14 Mei 1998. Mereka telah dikurniakan lima orang anak iaitu Rezal, Rezam, Roeza, Rozaki dan Rohasima. Rezal dan Rezam bersekolah di Bangsar, Kuala Lumpur dan tinggal di Asrama Darul Falah (ASDAF), Persatuan Kebajikan Islam Malaysia (PERKIM), Jalan Changkat Persekutuan, Kuala Lumpur.

bersendirian, beliau telah mengambil keputusan untuk memeluk agama Islam secara rasmi pada 14 Mei 1998.¹⁵

Sebab-Sebab Penolakan

Kajian berkenaan dengan Orang Asli yang menyentuh tentang sebab-sebab penolakan mereka terhadap agama Islam telah banyak dilakukan oleh sarjana tempatan, mahupun pihak JHEOA. Menurut Iskandar Carey, antara faktor penyebabnya adalah kerana kelemahan dalam soal pentadbiran Orang Asli. Pentadbiran Jabatan Agama Islam Negeri yang diuruskan secara berasingan daripada pentadbiran Kerajaan Pusat telah menyulitkan usaha dakwah kepada Orang Asli. Menurut beliau, hanya beberapa Jabatan Agama Islam sahaja yang aktif melaksanakan usaha dakwah di kalangan Orang Asli seperti Jabatan Agama Islam Negeri Perak dan Johor.¹⁶

Selain itu juga, kekurangan peruntukan kewangan di Jabatan Agama Islam Negeri dikenalpasti telah memberi kesan terhadap aktiviti dakwah. Bantuan kebajikan, bantuan pendidikan dan rawatan terhadap Orang Asli tidak dapat dilakukan secara berkesan. Guru agama yang ditugaskan juga dibayar gaji yang murah. Mereka juga dikatakan tidak mengetahui secara mendalam budaya hidup Orang Asli dan cara pendekatan dakwah yang terbaik kepada Orang Asli.¹⁷

Di samping itu juga, faktor seperti kena berkhatan, halangan pemakanan yang diharamkan kepada pemeluk agama Islam, keperluan ibadat sembahyang yang memerlukan mereka tahu Bahasa Arab menjadi punca penolakan Orang Asli untuk memeluk agama Islam.¹⁸ Penekanan amalan berkhatan selepas memeluk agama Islam,

¹⁵ Temubual dengan Johos bin Sibas atau nama Islamnya Johos Abdullah, Tok Jenang Perkampungan Orang Asli Broga, Mukim Hulu Langat di kediamannya di Broga pada 8 September 2000.

¹⁶ Iskandar Carey (1970), "The Religious Problem among the Orang Asli", dalam *Journal of the Malaysian Branch Royal Asiatic Society (JMBRAS)*, Jil. XLIII, Bahagian. 1, No. 217, h. 156 & 157.

¹⁷ *Ibid.*

¹⁸ *Ibid.*

walaupun ia bukan sesuatu yang wajib dilakukan, membuatkan Orang Asli takut dan semakin menjauhkan diri untuk menerima agama Islam sebagai anutan.¹⁹ Selain itu, berpuasa sebulan di bulan Ramadhan juga dirasakan oleh Orang Asli sebagai sesuatu yang membebankan. Keengganan para pendakwah untuk tinggal bersama-sama Orang Asli di kawasan pedalaman juga merencatkan usaha pengislaman di kalangan Orang Asli.²⁰

Perbezaan budaya dalam soal perkahwinan dan peraturan perceraian juga menjadi penyebab keengganan Orang Asli untuk menganuti agama Islam.²¹ Di samping itu juga, sebilangan Orang Melayu yang beranggapan negatif terhadap Orang Asli dengan menganggap mereka sebagai kanak-kanak serta suku bangsa yang pengotor dan liar juga menjadi faktor kerengangan hubungan Orang Asli dengan bangsa Melayu yang beragama Islam. Hal ini menyebabkan mereka tidak berminat untuk menganuti agama Islam.²² Sikap Orang Melayu yang tidak menganggap Orang Asli sebahagian daripada mereka kerana Orang Asli tidak beragama Islam juga, turut menjadi jarak pemisah di antara mereka.²³

Bagi mengatasi masalah di atas, usaha perlu ditingkatkan oleh semua pihak yang terlibat dengan dakwah Orang Asli bagi mengatasi halangan-halangan yang dikemukakan. Bagi Iskandar Carey, aspek-aspek positif

¹⁹ Lim Hin Fui (1997), *Orang Asli, Forest and Development*, Kuala Lumpur: Forest Research Institute Malaysia (FRIM), h. 60.

²⁰ *Ibid.*

²¹ Wazir Jahan Karim (1995), "Malaysia's Indigenous Minorities: Discrepancies between Nation-Building and Ethnic Consciousness," dalam Razha Rashid (ed.), *Indigenous Minorities of Peninsular Malaysia: Selected Issues and Ethnographies*, Kuala Lumpur: Intersocietal and Scientific Sdn. Bhd. (INAS), h. 28.

²² Temubual dengan Encik Md Daud bin Hj. Md. Zain, Pegawai Hal Ehwal Orang Asli Daerah Hulu Langat pada 5 Mei 2000 di Pejabat JHEOA Daerah Hulu Langat.

²³ Zainal Abidin Borhan (1984), "Orang Asli Malaysia Barat", dalam Khoo Kay Kim *et al.*, *Malaysia Masa Kini*, Kuala Lumpur: Persatuan Sejarah Malaysia, h. 140 dan 141.

Islam harus ditonjolkan. Amalan berkhitan misalnya, tidak harus ditekankan perlaksanaannya bagi Orang Asli dewasa yang baru memeluk agama Islam. Amalan berkhitan biarlah dimulakan di peringkat anak-anak mereka. Bagi ibadat sembahyang pula, bacaan *al-Fātihah* sahaja yang perlu dibaca di dalam Bahasa Arab dan yang lainnya dibenarkan disebut dalam bahasa asal mereka.²⁴ Dakwah kepada mereka harus mengambil konsep memudahkan sesuai dengan firman Allah di dalam *Surah al-Baqarah* ayat 185:

يُرِيدُ اللَّهُ بِكُمُ الْيُسْرَ وَلَا يُرِيدُ بِكُمُ الْعُسْرَ

“Allah mengkehendaki kemudahan bagi kamu, dan tidak mengkehendaki kesukaran bagi kamu.”

Rasulullah s.a.w juga pernah berpesan kepada sahabat-sahabatnya supaya melayan orang yang baru memeluk Islam dengan baik. Sabda baginda, maksudnya:

“Hendaklah kamu permudahkan dan jangan menyusahkan.”²⁵

Agama Kristian di Kalangan Orang Asli

Sejarah awal kemasukan agama Kristian di kalangan Orang Asli di Semenanjung Malaysia juga dikatakan bermula di negeri Perak sebelum Perang Dunia Kedua (1945–1948). Gerakan pengkristianan ini dilakukan oleh Batak Lutheran Missionary yang diketuai oleh seorang paderi bernama Napitoepoloe. Beliau telah mengahwini perempuan Orang Asli dan berjaya mengkristiankan lebih daripada enam orang Orang Asli. Beliau juga telah berjaya mengasaskan sebuah sekolah rendah untuk Orang Asli dan menghasilkan tiga buah buku tentang agama Kristian dalam bahasa Semai (Senoi). Buku-buku ini masih lagi diedarkan secara meluas di kalangan Orang Asli sehingga sekarang²⁶. Beliau juga telah berjaya mengkristiankan beberapa Orang Asli di Kampong

²⁴ Iskandar Carey, *op. cit.*, h. 157.

²⁵ Ibn Hajar al-Asqalānī (1979), *Fath al-Bārī bi Syarh Ṣaḥīḥ al-Bukhārī*, Jil. 1, Beirut: Dār al-Fikr, h. 163.

²⁶ Iskandar Carey, *op. cit.*, h. 158.

Chenggong, Behrang Ulu, Selatan Perak. Beliau telah mengajar Bahasa Inggeris dan cara bertani yang lebih baik dan efektif kepada penduduk tempatan.²⁷

Selepas kematian Napitopoloe²⁸, gerakan misionari Kristian dilaksanakan pula oleh orang Eropah. Namun demikian, usaha mereka ini kurang berjaya. Oleh kerana itu, mereka telah mengubah pendekatan dengan melantik daripada kalangan Orang Asli sendiri untuk melaksanakan usaha misionari Kristian dengan diberi imbuhan yang menarik. Usaha ini dilihat sebagai satu kejayaan kerana Orang Asli lebih mudah dipujuk oleh suku kaum mereka sendiri. Usaha-usaha mereka ini, walaupun dilihat tidak mencapai kejayaan sepenuhnya, tapi dikira lebih baik dan lebih mencapai kejayaan berbanding usaha yang dilakukan oleh guru-guru agama Islam.²⁹

Di kalangan masyarakat Orang Asli di Broga, agama Kristian diterima baik dan mendapat sambutan menggalakkan. Hampir 60% penduduk di perkampungan ini menganuti agama Kristian semenjak tahun 1987.

Menurut Encik Sharip bin Tajam, pemimpin masyarakat Kristian Orang Asli Broga, sejarah kemasukan agama Kristian ke kampung ini hanya berlaku di sekitar tahun 1987. Melalui pengalaman yang dilalui oleh beliau, Encik Sharip menceritakan bahawa salah seorang anaknya yang bernama Harun telah jatuh sakit kuat selama enam tahun. Pelbagai usaha dilakukan untuk mengubati anaknya termasuk membawanya ke hospital kerajaan, bomoh dan Tok Kong Cina telah menemui jalan buntu. Beliau telah banyak menghabiskan wang untuk mengubati anaknya. Keadaan semakin bertambah buruk apabila Harun menjadi lumpuh dan terpaksa diberi perhatian sepenuhnya oleh ahli keluarga yang lain. Akibat terlalu lama menanggung kepayahan

²⁷ Colin Nicholas, Anthony Williams-Hunt dan Tiah Sabak (1989), *Orang Asli in the New: The Emergency Years (1950 -58)*, t.p: t.tp, h. 147.

²⁸ Di dalam *Singapore Standard* bertarikh 16.9.56 diberitakan bahawa Napitopoloe telah pulang ke Indonesia pada tahun 1953. Sila lihat *Orang Asli in the News: The Emergency Years (1950-58)*, h. 147.

²⁹ *Ibid.*

dalam menguruskan anaknya itu, Encik Sharip mengambil keputusan untuk membuat pondok berasingan bagi Harun dan hanya menguruskan makan minum Harun dengan membiarkan najisnya. Beliau seakan-akan sudah putus asa dengan keadaan anaknya itu dan nasib malang yang menimpa diri serta keluarganya.

Pada satu ketika, sahabatnya yang bernama Alin seorang penganut agama Kristian dari kampung Jeram Kedah, Beranang di Negeri Sembilan mengunjungi rumahnya dan berkata bahawa anaknya, Harun boleh sembuh sekiranya berdoa pada *The Holy Spirit*. Di peringkat awal, beliau merasa ragu-ragu terhadap kebenaran kata-kata kawannya itu. Walau bagaimanapun, beliau berbincang dengan ahli keluarga dan mengambil keputusan untuk mencuba saranan kawannya. Selang beberapa hari Alin datang bersama abangnya, Pajan³⁰ serta Abas, juga penganut agama Kristian dari Endau, Perak dan mengadakan upacara doa mengikut ajaran agama Kristian. Encik Sharip sekeluarga turut serta dalam upacara itu. Selang tiga hari dari upacara itu diadakan, anaknya yang sakit itu mula menampakkan tanda positif dan mampu melakukan pergerakan kecil. Selepas beberapa hari lagi, anaknya kembali sihat dan sembuh dari penyakit misteri yang dialaminya. Peristiwa ini telah mendorong Encik Sharip untuk mempercayai ajaran Kristian dan mengambil keputusan untuk menganut agama Kristian dan mengamalkan ajarannya.³¹ Selepas peristiwa ini, lebih ramai lagi penduduk perkampungan ini yang terpengaruh dan menganuti agama Kristian di tangan Encik Sharip sendiri.

Namun bagi Berin bin Udah yang merupakan Tok Batin perkampungan ini menyatakan kepada penulis bahawa peristiwa itu hanya berlaku secara kebetulan, di mana sebelum anak Sharip dilawati oleh paderi tersebut, anaknya

³⁰ Beliau telah pun meninggal dunia.

³¹ Temubual dengan Encik Sharip bin Tajam, Ketua Masyarakat Orang Asli Kristian Broga, Mukim Hulu Langat pada 28 Ogos 1999.

telah beberapa kali dibawa untuk mendapatkan rawatan di hospital kerajaan.³²

Sebab-Sebab Penerimaan

Terdapat beberapa sebab kejayaan gerakan pengkristianan atau sebab-sebab penerimaan Orang Asli terhadap agama Kristian yang diperkenalkan kepada mereka.

Menurut Hasan Mat Nor terdapat dua faktor utama kenapa masyarakat Orang Asli tertarik kepada agama Kristian. Pertama, kerana strategi dan pendekatan yang digunakan oleh para mubaligh Kristian untuk memenangi hati Orang Asli begitu pragmatik dan menyakinkan. Keduanya, agama Kristian dikatakan lebih bertolak ansur dalam cara kehidupan Orang Asli dan Orang Asli juga tidak dipaksa mengubah identiti mereka setelah memeluk agama Kristian.³³

Selain itu juga, gerakan misionari Kristian dilihat begitu tersusun rapi dengan dibiayai bantuan kewangan yang besar.³⁴ Selain itu juga, strategi dan pendekatan yang digunapakai oleh mereka juga amat menarik Orang Asli untuk menganuti agama Kristian. Orang Asli dilantik menjadi pembantu paderi dengan diberi gaji serta imbuhan yang menarik.³⁵ Misionari Kristian juga turut memberi bantuan kewangan, kebendaan dan penyediaan tempat ibadat yang sesuai. Keadaan ekonomi Orang Asli yang agak ketinggalan, membuatkan bantuan sedemikian menyentuh perasaan mereka dan menyebabkan mereka memilih agama Kristian apabila dipujuk berbuat demikian.³⁶

³² Temubual dengan Berin bin Udah, Batin Kg. Broga, Mukim Hulu Langat pada 25 Jun 2000.

³³ Hasan Mat Nor (1994). "Christianity and the Peripheral Community: A Malaysian Case." *The Journal of Sophia Asian Studies*, Tokyo: Institute of Asian Culture, Sophia University. Bil. 12, h. 152-153.

³⁴ *Ibid.*, h. 153.

³⁵ Lim Hin Fui, *op. cit.*, h. 60 & 61.

³⁶ *Ibid.*

Maka dapat disimpulkan di sini bahawa, faktor kebendaan menjadi faktor utama yang menarik minat Orang Asli Broga menganuti agama Kristian.

Sebab-Sebab Penolakan

Melalui soal selidik yang dijalankan, faktor di mana Orang Asli tidak mahu terikat dengan tanggungjawab keagamaan dan merasa beban melakukan ibadah dalam agama Kristian menjadi faktor penting keengganan Orang Asli Broga menerima agama Kristian di kalangan mereka yang tidak beragama.

Di samping itu juga, perasaan rendah diri terhadap taraf pendidikan seperti tidak tahu membaca dan menulis dan taraf sosial seperti kehidupan mereka yang berada dalam kemiskinan menyebabkan mereka merasa janggal untuk hidup bersama masyarakat Kristian di Malaysia.³⁷

Selain daripada itu juga, hasil soal selidik yang dijalankan oleh penulis, ada di kalangan sesetengah Orang Asli yang masih kekal dalam kepercayaan animisme telah keliru dan salah faham serta beranggapan bahawa semua agama adalah sama dan menyeru penganutnya berbuat kebaikan dan melarang melakukan kejahatan. Mereka merasakan tidak perlu untuk menganuti agama tertentu kerana tradisi kepercayaan nenek moyang mereka juga turut mengawal tata cara kehidupan mereka supaya berlaku baik sesama manusia dan kepada alam semulajadi.

Saranan

Bertitik tolak daripada penemuan di atas, penulis ingin mengemukakan beberapa saranan untuk diberi perhatian oleh pihak-pihak yang berwajib. Antara saranan-saranan tersebut adalah seperti berikut:

1. Dalam usaha meningkatkan bilangan Orang Asli Temuan yang menganuti agama Islam di Broga,

³⁷ Baharon Azhar Raffe'i (1968), *Religion in Social Change among the Orang Asli*, Kuala Lumpur: Jabatan Hal Ehwal Orang Asli (JHEOA), h. 7.

pihak-pihak berwajib terutamanya pihak JHEOA, JAKIM, Majlis Agama Islam Selangor (MAIS) hendaklah memberikan bantuan material dan sokongan moral secara berterusan kepada penganut-penganut baru sehingga mereka benar-benar merasa terbela dan diberi perhatian sewajarnya apabila mereka memeluk agama Islam. Kebajikan anak-anak mereka dari sudut pendidikan rendah dan menengah hendaklah dibantu. Penulis berkeyakinan kejayaan anak-anak mereka dalam bidang akademik nanti akan menjadi contoh teladan bagi kanak-kanak Orang Asli Temuan yang lain dan seterusnya membuka mata kepada Orang Asli yang lain untuk mendekati Islam.

2. Para pendakwah dan Penggerak Masyarakat Orang Asli setempat haruslah sentiasa diperkemaskan dengan ilmu pengetahuan yang berhubung kait dengan adat dan pantang larang Orang Asli Temuan. Kursus kefahaman tentang adat dan pantang larang mereka perlu diadakan dari semasa ke semasa oleh pihak berwajib seperti JAKIM, JHEOA dan Majlis Agama Islam negeri-negeri.
3. Di samping itu juga, penulis merasakan perlu disegerakan pembinaan sebuah surau di Kampung Orang Asli Broga bagi memberi peluang kepada Orang Asli Temuan yang beragama Islam menunaikan ibadah secara berjemaah dengan Penggerak Masyarakat dan menerima tunjuk ajar berkenaan agama Islam setiap hari. Perpustakaan mini yang memuatkan buku-buku bercorak keislaman seperti kisah-kisah Nabi, Panduan Belajar Sembahyang dan sebagainya juga patut diadakan bagi menambahkan pengetahuan Orang Asli terutamanya kanak-kanak tentang agama Islam.
4. Orang Asli yang telah menganuti agama Islam hendaklah mengekalkan hubungan baik sesama jiran tanpa mengira anutan agama mereka. Mereka juga harus sentiasa berbuat kebajikan kepada jiran serta

menghulurkan bantuan jika diperlukan, khususnya kepada Orang Asli yang masih belum mempunyai sebarang anutan agama. Penggerak Masyarakat Orang Asli di Broga dan Tok Jenang hendaklah sentiasa memberikan galakan dan keyakinan kepada Orang Asli yang masih berkepercayaan animisme terutamanya Tok Batin yang mempunyai pengaruh kuat ke atas anak-anak buahnya, bahawa Islam adalah agama yang sebenar-benarnya. Islam adalah agama yang memandu manusia untuk mencapai kebahagiaan hidup di dunia dan juga di akhirat.

5. Khusus kepada para penyelidik dan sarjana Islam yang menjadikan Orang Asli sebagai subjek kajian mereka, penulis ingin menyarankan agar dipertingkatkan lagi usaha-usaha penyelidikan mengenai Orang Asli dari pelbagai sudut bagi menambahkan lagi khazanah ilmu pengetahuan untuk kegunaan pelbagai pihak terutamanya para pendakwah Islam, Penggerak Masyarakat JAKIM dan sebagainya.

Kesimpulan

Sebagai kesimpulan, dapatlah dirumuskan bahawa sebahagian besar daripada Orang Asli di Broga telah pun menerima agama-agama besar seperti Kristian dan Islam sebagai anutan mereka. Agama Kristian lebih menarik minat Orang Asli Broga untuk dianuti berbanding dengan agama Islam. Penerimaan agama Kristian di kalangan mereka telah menggambarkan kejayaan usaha missionari Kristian di Broga. Usaha dakwah Islamiyah pula hanya dilakukan oleh Penggerak Masyarakat JAKIM setelah lebih 10 tahun kemasukan agama Kristian di Broga. Kelewatan ini menyukarkan usaha pengislaman di kalangan Orang Asli di Broga. Pendekatan dakwah Islamiyah dan usaha perlu dipertingkatkan lagi bagi menarik minat Orang Asli yang tidak mempunyai sebarang agama.

Akhirnya, mudah-mudahan beberapa penemuan hasil kajian penulis terhadap proses islamisasi dan kristianisasi Orang Asli Broga ini akan membuka jalan kepada para pengkaji mahu pun pendakwah untuk menggandakan usaha bagi menanamkan bibit-bibit keimanan secara beransur-ansur tentang akidah dan pemikiran Islam di kalangan Orang Asli Broga khususnya dan Orang Asli seluruh Malaysia amnya.